

La regenza ha en mira ina societad da 2000 watts: la consultaziun tar la revisiun totala da la lescha d'energia è averta

La regenza grischuna ha avert la consultaziun tar la revisiun totala da la lescha d'energia dal chantun Grischun (LEG). Il sboz prevesa da cuntanscher a lunga vista las finamiras d'ina "societad da 2000 watts". Per quest intent duai en spezial vegnir meglierada successivamain l'effizienz energetica d'edifizis novs e duain vegnir promovidas en moda pli intensiva las energias regenerablas. En il senn d'ina funcziun d'exempel duain ils edifizis dal chantun Grischun ademplir en il futur standards energetics auts.

La politica d'energia globala è ina da las sfidas las pli grondas da las generaziuns odiernas e futuras. Ils sforzs che vegnan fatgs sin plaun internaziunal per far frunt a la midada dal clima portan ina gronda dinamica en l'entir sector da l'energia. Cun la revisiun totala da la lescha d'energia vul il chantun Grischun prestar ina contribuziun impurtanta per cuntanscher las finamiras da reduziun da la politica dal clima. En il center dal sboz da la lescha stat la clera voluntad d'utilisar las resursas d'energia en moda raziunala e persistente, e quai en emprima lingia cun reducir il consum d'energias fossilas e cun remplazzar energias fossilas tras energias regenerablas.

La finamira è ina "societad da 2000 watts"

La regenza propona da prender en egl las finamiras d'ina "societad da 2000 watts" e d'integrar explicitamain questa mira en la lescha. Uschia sa suttemetta il chantun ad ina politica d'energia che vul reducir considerablamain il consum d'energia a lunga vista. Il chantun è pia obligà da metter a disposiziun ils instruments necessaris e da realisar las mesiras ch'i dovra per pudair cuntanscher las finamiras correspudentas.

Ils elements ils pli impurtants da la nova lescha d'energia

Var la mesadad da tut il consum d'energia d'ina chasada normala vegn duvrada per stgaurar e per producir aua chauda. Il potenzial il pli grond per reducir il consum d'energia sa chatta en ils edifizis sez. L'element central da la nova lescha prevesa da reducir pass per pass il basegn d'energia termica maximalmain admissibel d'edifizis novs sco er da fixar finamiras da reduziun correspudentas liantas per edifizis existents. Gia a partir da l'onn 2011 duai il basegn d'energia termica maximalmain admissibel d'edifizis novs importar 40 pertschient damain che oz (quai correspunda circa al standard da MINERGIE senza ventilaziun), a partir da l'onn 2015 50 pertschient damain (circa il standard da MINERGIE actual) ed a partir da l'onn 2020 60 pertschient damain (circa il standard da MINERGIE-P actual). Il consum d'energias fossilas d'edifizis d'abitar existents duai vegnir reduci fin l'onn 2020 per 10 pertschient e fin l'onn 2035 per 25 pertschient en cumparegliaziun cun oz. Plinavant duain 10 pertschient dal consum d'energias fossilas dad oz vegnir remplazzads fin l'onn 2020 tras energias regenerablas; fin l'onn 2035 duain quai esser 40 pertschient.

Ultra da prescripziuns correspudentas prevesa il sboz da la lescha da cuntanscher questas finamiras principalmain cun agid d'impuls finansials a favur da sanaziuns dals edifizis e da lur indrizz technics. Per cuntanscher las finamiras da reduziun fa la regenza quint ch'il dumber da las sanaziuns cumplessivas d'edifizis, che vegnan subvenziunadas, sto vegnir multiplitgà cun trais en l'avegnir.

Concretamain fixescha il sboz da la lescha ch'il chantun concedia contribuziuns da promoziun per:

- sanaziuns cumplessivas d'edifizis;
- sanar ils indrizz technics dals edifizis (edifizis existents), utilisond energias regenerablas (laina, sulegl, chalur da la terra e dals conturns);
- edifizis novs ed edifizis novs da substituziun che han in caracter exemplaric;
- megliar il grad d'utilisaziun da process commerzials ed industrials;
- remplazzar ils stgauraments electrici tras indrizz che utiliseschan energias regenerablas;

Communicaziun da la regenza, chanzlia chantunala dal Grischun, 7000 Cuir

- indiriz energetics gronds d'impurtanza chantunala u regiunala.

Il chantun sco exempel

Tenor la proposta da la regenza duain ils edifizis dal chantun sa distinguer tras in'utilisaziun exemplarica ed effizienta da l'energia. Concretamain duain edifizis chantunals novs ademplier a partir da l'onn 2011 il standard da MINERGIE-P e sanaziuns d'edifizis chantunals existents il standard da MINERGIE actual. La funcziun d'exempel dal chantun na duai betg mo vegnir observada tar la construcziun, mabain er tar ils indirizs technics e tar il manaschi dals edifizis.

Ina legislaziun che s'orientescha als resultats

Il sboz da la revisiun totala da la lescha d'energia dal chantun Grischun resguarda ils principis d'ina legislaziun che s'orientescha als resultats. Il cussegl grond definescha las finamiras e fixescha ils pass intermediars che ston vegnir observads en mintga cas sin la via a las finamiras. La planisaziun da concepts d'energia e dal program politic correspondent sco er la fixaziun da las mesiras èn chausa da la regenza. Ella elavura in concept d'energia da plirs onns che mussa, co che las finamiras fixadas duain vegnir cuntanschidas. Il concept cuntogna er ina bilantscha d'energia ed ina controlla dal success sco er ina prognosa per il temp vegnint. Sch'i sa mussass che las finamiras na vegnissan betg cuntanschidas, stuessan las mesiras vegnir adattadas per curreger il svilup.

Consequenzas finanzialas e persunalas

Per pudair cuntanscher las finamiras da l'emprima perioda da planisaziun da 5 onns, las qualas èn definidas en il sboz da la lescha, fa la regenza quint a partir da l'onn 2011 cun 12 milliuns francs ad onn per financiar ils programs da promoziun. Quai è var trais giadas dapli meds da promoziun che quai ch'il plan da finanzas vertent preveseva. Cunzunt per sanaziuns termicas d'edifizis ston vegnir mess a disposiziun dapli meds finanzials. Ulteriurs meds finanzials dovri per promover energias regenerablas sco er per extender las purschidas da cussegliaziun e da furnaziun supplementara. Collià cun quai è er in augment dal persunal.

Ils documents da consultaziun tar la revisiun totala da la lescha d'energia dal chantun Grischun pon vegnir consultads sin la pagina d'internet da l'uffizi d'energia e da traffic (www.aev.gr.ch) sut la rubrica "actual". La consultaziun dura fin ils 9 d'october 2009.

Infurmaziuns:

- cusseglier guvernativ Stefan Engler, schef dal departament da construcziun, traffic e selvicultura, tel. 081 257 36 01
- Ernst Bachmann, manader da l'uffizi d'energia e da traffic, tel. 081 257 36 21

Gremi: regenza

Funtauna: rg chanzlia chantunala dal Grischun

Data: 08.07.2009